

四庫全書

集部

欽定四庫全書

御製詩二集卷七十二

古今體五十八首

丁丑七

將往徐州閱河命簡親王奇通阿率衆護衛

皇太后先至山東靈巖行宮駐蹕減從登途八韻紀事

有序

州維禹畫方見雅歌溯開國於大彭指名都於西
楚聿自澶淵既徙遂當黃水最衝比至邇年益為

險要當怒濤澎湃之際束於地狹則勢激而成危
迫濁流瀰漫之餘分於力弱則沙渟而致淺中泓
易阻上游受倒漾之災旁出多歧支渠有奪溜之
患頻年告侵勞負楫於公卿鄰壤不登嗟釋耒於
黎庶披圖蒿目曾無長策之可施覽奏增憂孰則
成勞之可恃乃者翠華時邁清蹕言旋相望數程
親臨周視惟是經途沮洳掖

輦非宜抑亦繞道遙征輕裝取便爰簡親藩而衛從先

駐勝地以憩留民事籌咨計往還者旬日

慈顏載覲奉

色笑於晨昏律諧八韻事述五言

禹蹟久湮廢堯災每大投漢曾通鉅野宋已賦黃樓近
歲益淤墊乘時欲酌籌

安輿遵故路減從指徐州永逸誠無術預防要有謀策
誰陳賈讓佑獨籲陽侯所恃茨今捷還虞伏與秋未觀
愁弗置觀亦祇增愁

欽差工部侍郎夢麟總河白鍾山等奏報荆山橋
疏浚工成命議叙董事諸臣詩以紀事

去年秋溢孫家集大事焚樾塞決口餘波泥澱荆山橋
微湖路塞水不受連延數郡被灾沴未涸春田農束手
加賑聊以救目前善策亟為籌其後冬官之亞適隨鑾
相度疏排汝其懋

叶

南北河臣

江南總河白鍾山
河東總河張師載

胥本

責毋分疆界連臂肘集役備物發帑償守土臣職晉也

就

叶安徽巡撫高晉

同心合力勉宣防豈在清塵供奔走淪濬

兩月工始成荆山水洩四臣奏叶二麥雖已失餅餌大
田庶可播畝畝酬勞獎績爾則應消患致和吾益忸

賜河道總督白鍾山

南巡江國周遭歷不使河干負弩朝嘉爾導疏合優叙
肯因小節課臣僚

安瀾

龍王廟六韻

皇考勤民瘼

龍祠建皂河層甍臨聳壩峻宇鎮廻渦

誌祀精誠達安瀾永佑歌彭城將往閱宿頓此經過捍
禦方多事平成竟若何所希

神貺顯沙刷輯洪波

舊邳州

艾陽遷建

聖恩留

康熙己巳年始改建州城於艾山南

患自羊山初改流一片白波

浮故壘土人猶道舊邳州

七壩

西來近彭城川狹河益曲曲則名生工舉芟事脩築昨
過夏家路七壩茲經復疊葦禦洪濤洞心吁駭目尚聞
水工云如此不一足救急固云可經久誠非淑以官為
家者方藉資津澆譬如人無疾爬搔偶成毒毒已雜方
投禍多鮮見福

所過示總督尹繼善巡撫愛必達

所過沮洳鄉民艱觸目是入疆覘田野大都荒蕪矣高

地縱種麥或冀半收耳低地麥復滂青黃將安恃翻犁
播禾黍復苦無種子官借雖有例吏胥弊無已罪固孔
距心吾豈徒責己方伯日隨鑾爾我同見此設更無實
政責又將誰委方面逮有司如臂之使指其遍歷窮鄉
民瘼周詳視開倉貸穀種加賑賙流徙惠必使遍霑仍
防蝨侵技勗哉各盡心庶俾瘡痍起

麥田

麥田狀不一高下頓爾殊高可望餅餌災後口聊餬下

者春即潦根黃苗半枯哀哉筑筑民食將近奪乎加賑
至夏五倉儲嗟無餘博施古已難況多蠹役徒豈如接
青黃各為足食謀見高固少慰見下增憂吁慰不抵憂
多民艱紛蹕塗

渡黃河駐蹕徐州作

畫州思禹績建國緬堯封楚漢惟蝸角山川實地衝澶
淵徙以後渤海入無從邇日淤尤甚防秋策預供用爰
紆六轡都大為三農恬浪徐鳴槳洪流高指壩驚心斯

創見著意敢辭慵寧更言多費惟勤救鞠詘石隄築一

律

徐州北面護城有石隄而東西皆土隄命易之以石

葦埽勝千重惟是補偏計

曾無永逸庸黃樓讀昔賦宋代即今踪謾詡新沙刷

水工

云近日城下黃流較前刷深三尺許

寅哉茲偶逢

災餘

災餘癘必行古人言之矣將為徐州行大吏云宜止去

去闕民瘼寧忍復避此銅山莅古邑菜色嗟怒視藍縷

鮮完衣踉蹌或無屣實澤果遍及仍然故何以太醫雖

庸醫玉缺珣珙美四鄉分往救所司撥藥餌叶斯固子
產惠應勝魏公指視爾傷曷瘳曰予愧無已

彭城河復

蘇公河復昔非復彭城河復今仍河仍河何以謂之復
解嘲聊爾為斯歌漢唐以來通鉅野燒草不屬無如何
侵淫呂沛漸多事川狹濤怒騰盤渦然惟宜合不宜散
合資刷沙離渟波斯流雖古有成語徒見其害利則那
去歲奪溜孫家集中泓力緩沙淤多隄旁水誌度分寸

泥停五尺高益加桃汛湯湯已拍岸伏秋轉眼難延俄
用是切切愁弗置紆程歷覽親研摩下策仍惟事脩築
易石鞏固周遮羅水工喜稱漸復舊數日頓爾形遷訛
三尺沙刷餘二尺誌在敢飾虛言訖此亦偶然慢過頌
靈實昭矣感不磨

遊雲龍山作

彭城駐輦厓河防咫尺雲龍戲馬旁本意原非是山水
偷閒聊復訪蘇載張天驥翠峯夏首關林葉綠野風清泛

麥芒底事今來艱迫句為民籌濟為民傷

大士巖

峯有飛來像豈無色空空色定同殊普門誠切宏慈願
利濟應殷此際夫

試衣亭用蘇軾韻

甕乏黃蘗身缺衣民艱露冕訪斜暉祇餘慙若先憂切
那有軒然逸興飛

放鶴亭歌

木石豈千年羽衣早翮去何來雲龍頂依然有其處疏
軒眺遠棲嶙峋階前亦立胎仙羣坡翁公案一重唱爾
時更有張山人青山綠野古徐州黃河之水東南流本
意登臨豁遠志宣房深計翻增愁

戲馬臺用謝靈運詩韻

謝客昔攬勝擣藻蜚白雪逸志託邱園皜皜秋陽潔西
來為籌河彭城此駐節薰浚無良方俾人資賢哲旋顧
災餘民食乏衣並缺八珍為弗甘寧能暢遊悅雲龍有

蘇蹟秀色城頭列途便臺頭寺

即戲馬古臺也

清詞記一闕放

鶴已憩驂戲馬慢停轍寄言賡佳作伊人所懷別汲古
緬心藏撫今慚治劣

孫家集

去歲霖為災漫灘遂奪溜

上年秋汛後黃河漫溢孫家集是處本無隄工以備盛漲

例於秋汛後補築水衝溝渠而富勒赫漫視之兩年未嘗補築遂致成渠奪溜特命尚書劉統勲督工堵禦河

流始復故道

先事防少疎禍致不可救非人用鰥官吾過其

誰售連延於荆山齊豫胥滂邁用是深厓懷王臣課奔

走捍禦築決口疏濬通下就今來閱崇隄未雨為綢繆
叶層層牢關鍵切切防滲漏此誠燃眉計秋遙奚善後

登黃樓作

岑雋傑構俯徐城黃堊還存玉局名作鎮千秋彭與沛

祀賢並坐弟和兄

樓中胎塑子瞻子由像

我詩傑句真無就夫子

當年妙獨成

二語縈括東坡黃樓詩句意

太守為民猶切意况吾饑

溺敢忘情

再題黃樓用蘇軾韻

黃樓登不可無說更讀蘇詩引興發上惟青天張幕圓
下有洪川流笏滑脫胎高坐兩賢人便欲拾級嫌塵鞮
遐想九日勝賓筵痛飲豪歌鸚鵡呬亦未因樂忘憂民
隄築王尊督畚鍤我來黃水雖刷沙災後饑民景憐然
北瞻豐沛開霸圖南望雲龍羅梵剎城頭曾不淖泥侵
河中亦有鳴榔軋卽景都弗減愁懷鮮嘲險韻聊吟壓
泗水無從覓津滴楚山依舊圍巖齧嗟我羣黎乏衣食
那有千村畜雞鴨違議紆程切恫瘝詎同攬結尋苔雪

初議至徐州闕河大吏僉以頓次為積雨停潦所侵經途淖溽多方沮止朕以籌河卹災非事遊覽不可中輟排衆議登程連日晴明安驅周覽一如初指

渡黃河

春巡來往六乘舟總喜風恬濟巨流民務河防予並厯天禧

神貺衆蒙庥越山吳水別江國齊郡燕畿指陸郵只有此都人太鞠不堪感額望迴頭

子房山用謝瞻子房詩韻

揮金報韓侯藉箸翊漢王氛除紫色爭運扶火德昌惟
是籌軍帷寧必奮馬槍定策都關中天府開堂皇業成
即翻飛赤松白雲鄉過祀仰高風千秋崇此疆

荊山橋歌

石橋三里許以長如虹蜿蜒飲兩塘南北咽喉形勝控
春秋節宣計畫良東接睢邳耕桑野西連豐沛王霸鄉
我曾坐照資利涉發帑脩築乃如常

乾隆丙寅發帑數萬脩橋至丁卯年

告徐州省方今迴蹕路便因度斯輿梁去歲孫工河奪

溜聞道經此東歸洋一百餘孔不足洩其時水過橋面
強水過沙停半淤澱微山遂壅趨壑方疇咨督課速疏
浚即今尾閭纔通航吁嗟民艱觸目是善後之策猶茫
茫

入山東境

去去雁鴻減行行鷄犬繁一朝渾別省百里易方言對
此慰誠切過來愁尚存亂山合沓處廻首是彭門

韓莊閘

韓莊界微湖蓄水以濟運猶恐春水弱冬令例疏濬去
歲黃漬溢壅遏湖流順泛溢連運渠無從辨堤堰即今
漫緯道轉漕遲北進荆山近雖剔十未減五分立馬望
湯湯播種待數郡艱矣籌河防惡哉念民困

降旨截漕十萬石為徐州鳳陽各郡縣倉儲之備

詩以言志

加賑至夏五民猶未免饑平糶及借種諸政命齊施常
平雖積貯展轉將無遺我身縱北來我心每南馳彭城

實親歷瘟疫方乘時不待監門圖目覩嗟流離鳳陽所
屬縣聞亦同沛徐叶惠但施經見向隅豈其宜夏非截
漕時灾重不可泥叶分貯補倉缺緩急可賴之與我共
治者寧非良有司體此在抱心推行其善為

麥色

麥色北來日勝前黍禾鋪野潤芊芊含風沃露清和月
追歎希豐齊魯田境不灾荒方講讓戶多弦誦自興賢
蕭豐均是吾民耳鵠面鵠衣劇可憐

詣

闕里瞻拜

去歲躬親奠

素王迴程重謁

廟堂皇誰知獻馘翻成偽

去春以上年平定伊犁親告闕里啟蹕時適得擒獲阿

睦爾撒納之報久之乃知策
拐等為賊所給輕信妄奏

遂致餘氛更構殃

逆賊既未就獲

颶竄哈薩克其餘孽尼瑪等復
與噶爾藏多爾濟糾結為亂

豈礙告成斯定局曰惟

聲罪不庭方

祖功

聖德胥垂佑在泮行歌載載章

駐蹕古泮池之作

古泮城東在鳴鑾此日停壁詩宛隔歲

去歲駐蹕於此壁間留題庭

柏只常青自較羶廬爽況看石沼渟卑宮近思訓切切

志遑寧

皇太后車駕至泰安行營問

安紀事

紆程十日往徐州齊甸言旋傍麥秋趨謁

起居倍常敬慘舒民氣

奏從頭

謁

岱廟六韻

春巡限定程望

嶽寄遙情用趁迴塗便一申肅拜誠震方惟

帝出寅德肇人生仰載無私禱祈年有屏營英雲籠寶

殿佳氣護曾城退憩尋環詠

環詠亭在廟西側四壁刻歷代遊人詩

詩裁

不易評

登泰山作

合雲亭度棧縈紆旬歲重教履巘途昔日今時渾不隔
登封降禪總無須儻來憂樂亦多矣試問山川畧異乎
昂首天門三萬尺到因步步積工夫

壺天閣

迥閣昔經坐今來無復登攀躋緣未暇攬結識吾曾碧

水自深澗白雲指上層勒崖多舊句歷歷可明徵

迴馬嶺

昔人迴馬地進馬跋巖扃夫子有明訓功母一簣停

朝陽洞

當年題句處洒掃備延停雲棧猶翹白岱峯未改青不
教鎮留憩緣是舊曾經率以勞為逸天門即叩扃

十八盤

猶記昔登十八盤坦途高架丈餘寬曾因過費飭方伯

率為趨平奉

大安

戊辰恭奉
道險峻皆成坦途

皇太后安輿登岱有司架木為棧
朕策馬以登不令架木

今度揮鞭吟馬上不教做棧闢雲端石梯拾級千層迥

却喜巖峯本色看

登泰山三依

皇祖詩韻

春月南巡限程迫題詩興寄碧岳頭設如兩度皆空過

辛未及
今丁丑終覺一心太率浮謁

聖纔辭曲阜縣登山遂至泰安州乾坤普照

天襟廓景仰

奎章萬古留

瞬息十春巖電影年來憂樂憶從頭誰能石上三生認
且看烟中九點浮幻矣仙踪謝蓬海憫哉民瘼指徐州

雲巢若問前巡事

岱頂行宮名戊辰三月
孝賢皇后得病實於此

淚灑空庭

不忍留

西峪

又問靈巖路言從西峪途林陰入夏密峯翠較春殊詩
意常思李畫情詎讓吳時存勤政念一宿豈妨乎

登玉符最高峯得四百字

春巡氣尚寒有興未登眺清和茲返轡日長况早到宇
宙最奇處空過山靈譙設如逢炎暄揮汗亦何要時景
值佳會况鮮幾務告邂逅不可失一暢智仁樂園北啟
便門不必命旌纛肩輿陟崇椒林鳥為前導推婁羅疏
峯威紆列層嶠陡壁若無路一綫穿林徼或如田見龍

或如霧隱豹或雄以猙獰或深以窅窅或秀若丹青或
壯若廊廟樹抱石為胎泉飛峽成調山花霏細芳山禽
遞幽噪歷歷所攬結朗朗開懷抱舍輿還進步何藉筇
屐趨初至半室巖屨屨似棚窖方牀儼維摩不著天花
落_叶為想詩僧逸頓息塵緣鬧躡險捫烟蘿洞有白雲
號膚寸一脉起澤應三農禱證盟功德頂調御真古貌
巢鶴最高處仙胎宛可召應接乃無暇竒觀供四照南
瞻日觀峯是我昨所造北睇鵲華翠雲中辨隱約其東

朗公近疑聽錫聲標惟西乃豁開來路盤崖隩已覺鮮
其匹便欲觀其竅設匪片時勞安識無窮妙蒼然日色
暮歸路尋舊峭憶昔可公輩別傳西竺教想亦巢許流
林泉寄笑傲侵尋事莊嚴逐末吁可笑其師若有知弗
許頭應掉有為法終幻成壞像相詔猶然冀施檀云有
福田報松隴坐靜觀萬緣信誰覺忘物我未能吟懷且
推敲

恭奉

聖母懿旨啟蹕還京紀事

有序

徐方時邁

鸞馭暫違曲阜言旋

惟宮載覲迨蒞玉符之勝境泉石蔚其清涼聿奉

鑾輅於名區飲膳調其旨適廼頒

懿訓俾速星言奏小憩以同行未蒙

慈允用首途而逸發仰體

聖懷中宮率嬪御以承

顏親藩整師徒而扈蹕稍稽旬日佇侍

起居詩紀五言情抒六韻

南巡三閱月北至近臨期

方澤躬禋際明庭臚選時皇都程尚遠

慈馭速非宜况

喜名山秀欲

留幾宿願親藩簡護衛宮眷畢追隨

懿命關勤政前驅

志敬茲

題倪瓚獅子林圖疊舊作韻

誰知獅子林宛在金閶有

舊題云借問獅子林應在無何有蓋彼時不知即在蘇城

也一溪與一峰位置倪翁手

園中點綴云皆雲林自構

我昨涉其藩

安能契授受已覺淨諸品外物不足垢郵卷重題辭尚

聞竹籟吼

開山驛

開山向平野東北濟城垂已過十年事惟消片刻思

自戊戌

辰至今凡
十年矣

了知如寤夢何必惹清悲朝爽城猶近前旌
可慢移

聞京師得雨誌懷

北省春率旱十歲九憂常今年誠厚幸值我巡南邦奏
書每開讀頻報甘膏滂大抵符旬期雨後即宜暘二麥
可冀收黍禾苗俱長齊魯一律然額手為民慶惟是西
南鄙仍多沮洳鄉荆山亟疏治積水奈汪洋所涸未及
半播種不可望為此弗寧居更籌救民方喜音復北來

二寸沃綠秧驚慰繼以疑行看懷新良憂喜總因農憂
多喜每忘嗟此兩髻間安得不點霜

命江蘇巡撫愛必達馳至行在問以徐州事

齊魯如雲麥望秋憂心日夜在徐州亟來更有疇咨事
首問吾民畧息不

過運河

一水宛分趙與齊浮橋飲練接長隄去纔弱柳含烟嫩
迴看來牟擺浪菱較雨量晴以度耳慰豐愁儉亦紛兮

僕人惟識皇州近揮策誰能惜馬蹄

浙江督撫奏報時晴應律蠶麥有收詩以誌慰

武林風雨送登舟直達金閶勢未休人道常然不足慮
我虞過度每緣愁時晴忽報山川朗及節欣聞蠶麥收
南望那能無一笑旋因徐沛蹙眉頭

降旨免濟寧魚臺等五州縣積欠詩以紀事

齊南五州縣去歲秋霖傷荆山不能洩率因河為殃春
巡始知然督課疏濬忙茲來問涸土一半纔播秧其餘

尚沮洳安可冀秋糧無收則賦艱災黎焉能償亟應籌

撫卹詎可言出疆

是日已過德州

加賑至夏五更無施惠方廉

知負逋賦其數十萬強概與豁徵輸閭閻俾樂康羣赤
庶少蘇努力西成望

紅杏園

簾樹罷紅雨庭莎深綠雲去來原未異春夏若為分榭
較擅廬爽池饒水沼文田田出蓮葉龜戲誦清芬

即事

奏書披置郵春雨足皇州北往人恒問南垂澤未優景

河遼兩界

自京往南者皆云河間景州雖已得雨然麥收及大田播種景象不如京師一帶及德州

以南今視之果然

齊魯抵三秋

諺云一麥抵三秋

設匪經親覩吾將自

此愁

逢熟

舟行兼頓落帆遲率道何須太急為今日歸途已逢熟

始知先是趙程宜

免河南夏邑等四縣積欠糶括其事成詩

巡省匪遊觀民瘼咨處處春月往南時舊臣畢覲御家

屏

彭

實豫人問以稼穡故奏稱數載勞蠲賑皆未遇是

時彼方伯

圖爾炳阿

迎鑾正隨路同宣近前席詳告聽莫誤

州縣或欺爾爾莫欺黎庶黎庶且勿欺當前可迴護挈

彼往細勘改過要應速

叶

罪汝亦豈難而予更有慮鄉

紳汝治下聽彼罪汝遽此風頗有關所以姑寬恕隔月

撫臣報履畝親相度

叶

米貴則誠然蓋緣賑糶去只可

言借貸未可言賑務聞之為悚然誠未解吾懷特命賑

一月稍救溝壑赴迴鑾至彭城乃有道旁誦謂鮮受實

惠至今困沮洳因思可使由聖語有精趣加賑反告災

母乃希恩屢復忖頗有人一往其過怙叶是亦不難辨

彭城多瘠苦叶隨來諸部員其狀盡親覩叶遴往四縣

察與徐同異著旬日觀保迴即遴往之部員也備言民痛勸與

徐頗無二而苦無恩佈吁嘻有是哉是不宜再顧方伯

及方面爾皆為民牧叶我無靳惠心而胡諱災固罷斥

示重懲更簡賢才付年來愛民意寧有未盡喻猶然殃

我民咄哉益知懼

駐蹕趙北口作

萬柳跋長隄江鄉景重題誰知今趙北大似向杭西魚
鳥悅人意靡燕惜馬蹄渚宮乘爽到雲水眇清淒

往來三閱月瀟灑一憑窓了識隙陰速未能塵意降風
漪青草接沙渚白鷗雙欸乃雲汀外漁舟唱晚腔

新城道中

北來麥益佳黍禾亦日好自此晴雨時西成冀萬寶邇

來頗炎蒸土燥埋秧小朝露雖畧潤終覺為澤少為之
復望霖因以常年考春旱率成例祈至花開棗麥秋恒
歉登大田尚可保豈能如今歲綠野懷新早蜀望人盡
同欲速詎非躁叶自解雖如斯希澤終縈抱江浙晴方
佳燕齊雨滋妙叶寰宇九萬里畢願時若報叶慰少憂
恒多分應箇中老

良鄉行宮晚坐

停鑾來往近皇都瞥憶南巡此啟途
三月光陰誠迅矣

百年久暫豈殊乎

展義從來重豫遊
日休日助悉心求
觀豐未覺饒同樂

視歉惟因切先


去聲憂

越水吳山攬結餘
北來饒得事何如
清歡未抵殷憂盛
不在蘇杭在沛徐

甌香研淨值幾閒
記里詩篇自改刪
却我無心戀江國
是誰有意賦東山

陰

冀天傍晚佈濃陰澤豈辭多望作霖却是舟行常嬾見
思量人信鮮恒心



御製詩二集卷七十二

欽定四庫全書

集部

御製詩二集卷七十三
四

詳校官尚書臣德保

助教臣常循覆勘

總校官原任中允臣王燕緒

校對官中書臣朱炘

謄錄監生臣蔣鳳姓

欽定四庫全書

御製詩二集卷七十三

古今體一百三十二首

丁丑八

南巡廻鑾駐蹕圓明園之作

麥登秋穰黍全耕喜氣迎鑾達帝京又此南巡成北返

恰看夜雨值朝晴

是夜微雨

康功災壤憐羣赤勤政明廷接

九卿

懿旨身遵心

膝下所欣旬日近歸程

日啟

皇太后駐蹕靈巖以十九
鑾回京午熱緩行計

當遲十

餘日

雨

夜雨微聽枕上聲迴鑾羣趁曉來晴黃看麥熟雖云可

綠為黍苗又惜生却喜雲重

平聲

鋪碧宇更希澤為

去聲

倚

前楹農功較比常年美因美翻紫望善情

題郭畀雨梧烟柳用倪瓚韻

疎梧及嫩楊沉著如中酒不宜作畫看草書傳顏柳

御門日作

南巡三閱月勅幾心敢懈叶問民晉岳牧諮政接寮案
驛章按程遞批荅或至亥庭對雖故事愛禮正茲在廻
鑒所先務百爾共亮采念彼勞始逸勗此敬勝怠周易
有名言乾惕時自宰

西直門外

麥率登場黍蔚塍懷新佳趣入吟憑奄觀今日誠堪慶
歷比常年得未曾更冀為霖霈膏澤益殷祈歲勵冰兢

先憂用是憂恒切後樂繫吾樂豈能

齋居

鶉首星臨次羲車日最長
辨方慎水火協紀驗柔剛
雞漏報遲箭龍舟罷遠塘
遄臻緣忘

祀詎為度端陽

是日正值
端陽節也

題范寬行旅圖

山容雄勝秀水勢急非寬大
是北方景誰歌行路難風
疑生萬葉雲欲出遙巒簡
淡四家法於斯鼻祖看

偶寫寒山口號

腹藁寫寒山聊乘片晌閒所懷寧止此九寓寸心間

夏至

北郊禮成述事

年年躬

祭典速速命歸騶八變成池奏六宗

殷祀脩山疊喬雲飾況齊瑞蘭浮茂對欽調助寧惟端冕旒

恭迎

皇太后車駕至

暢春園得近體一律

方山佳景似西池養

志因成小憩遲順

旨遄歸勤大政問

安頻遣繫遐思歡迎

鳳輦臨長日怡駐

仙園協清時廿日寸心縈頓釋階萱庭栢總含怡

雨

五月十二日

春月屢霑澤北畿得罕聞自我過德水晴久路飛塵二麥
景實佳禾黍遍耕耘人稱不雨好此則就麥論究之大田
多甘膏豈辭頻遵途返皇州殷祀已躬親驟雨雖每零尚
欠優渥云為是亟希霽如常此望雲展轉祈歲憂共我那
可分連朝膚寸濃霖霖流天津覘土已接潤簷溜猶滴茵
適可仍惜止稍慰詎敢欣喜少愁恒多仔肩萃吾身

題王炳倣王蒙松路仙巖圖

松路仙巖王蹟真倣臨一再得精神藝惟師古過時輩

因悟菁莪作育人

炳學畫未十年臻此以為難矣

木根如意

生意青山昔枯禪白足家天然愛幽素俗製謝雕華器
擬辭林竹形如出水花時晴復時雨所願更何加

麈尾雖同品何曾王謝家竹如贈僧紹木可悟南華月
掛千秋鏡天霏四座花山中設九錫談柄定須加

淶水曲

淶水冬夏淶澗中菁藻梳誰云無所藉雨過漲滿湖

携手曲

白者知為馬牝牡猶待選黑者知為烏雌雄更難辨置
酒三層臺新聲颺宛轉密席近携手低語通情款情則
各蘊衷對面千里遠

夜夜曲

夏夜苦短冬夜苦長河橫斗直東參西商豈無美酒戒

之在旨豈無清歌聽不為喜中宵起坐曰有軍書機綮
未中遙望踟躕蘭室之溫沙塞則寒自我懷斯於今三
年

昭君怨

昭君出玉關迴首遠家山雙眉底頻蹙勝怨不勝顏
龍沙去去臨鶴禁行行遠何如荆門村脩竹倚秋晚
賂匪黃金輕命是紅顏薄不然毛延壽何能消美惡

趙伯駒春山

古寺雲霞嶠人家桃柳村精神北宋本結構仲長論大塊文章續春山隱括言不須問名氏望可識王孫

驟雨度池塘

驟雨度池塘烟光接水光既優亦既渥覺熱頓覺涼柳絲及葦葉妙趣含蒼茫憑欄有餘興命舸泛瀟湘瀟湘

豈在邇神會無彼此忽憶麥報秋久霖戀青矣

麥熟後宜晴遇

連雨刈遲則顆粒不堅農家謂之戀青有減分數

因之復望晴曾無半日喜

太液池泛舟

朝晴夜雨果然宜
淡沲紫霞舟名泛液池
底識甘膏南畝

渥堤楊猶帶露珠垂

冬宜紫禁夏宜園
還蹕因掄新狀元
籲俊勅幾慰雨後
趯臺薰景便中論

文徵明竹樹即用其韻

蕭落槎枒各有神
新蕪詭石靜無塵
物猶擇友兩相得
應笑燒琴對畫人

同豫軒得句

太和詰旦御臚傳西苑更衣取靜便雨後峯姿都渥若
風前竹韻特悠然窓臨闌闌民藏富治協柔剛志體乾
同豫端知在時若敢因怡肆益因虔

聽鴻樓

不必拘春不必秋長天目送響悠悠若於沈約詩中會

擬合更

平聲

名八詠樓

進舟長河至昆明湖萬壽山

爽進輕航細雨餘長河今歲是權輿麥登場好黍雲蔚

桃謝隄芳柳線梳萬景已欣吟不盡三吳那更較何如
昆明亟待親沿賞過眼其他姑舍諸

鳳凰墩

泛舟不是梁溪路舉目緣何皇甫臨

是處傲無錫
皇甫敞為之

結習

也知未宜著勿能忘者憶民心

昆明湖泛舟至萬壽山即景雜詠

界湖玉蝀飲漪波上下天光一色多我適餘杭返巡蹕
那更蘇氏較如何

湖濶微風亦作濤錦帆不藉進長篙今春雨足畦餘水

羸得昆明漲影高

昆明湖蓄水以灌稻田每當春雨缺放水溉畦湖內或艱行舟今歲雨

足故湖水甚富

宛轉長隄夾鏡臨六橋一帶雅宜尋景明樓畔青青柳
未見含烟早鎖陰

香錦盈盈微露鮮雖無麴院有風蓮此中神解都知否

十景應教圖補全

春月西湖尚未開荷花故云

夕佳樓

山氣橫窓水氣浮揣稱名署夕佳樓漫云津逮陶彭澤
還覺當前勝一籌

萬壽山即景

松風宛是昨年聞偃蓋新添翠幾分隔歲山容忽入夏
閱時塔影漸橫雲

時構塔已至第八層尚未畢工

峯明湖秀誠雙絕越

角吳根擬慢云即景非關動生戀可忘向日衆情殷

靜佳齋

簷隱樹龍蔥堦棲巖窮劣借與周濂溪於中圖太極

構虛軒

蓮宇冠層峯別嶂此最迥何必盡居佛構軒習吾靜遊
與顥氣俱坐覺小年永澄觀理氣機妙契神明境泊然
室生白曠矣寔含景獨惜無多暇恒此天倪省

袖嵐書屋

嵐懷屋復屋懷嵐虛受還教愜靜含安得總忘憂樂事
喬仝攜手箇中談

再題李公麟醉僧圖

身似枯藤心似灰醉中把筆笑顏哈公麟津逮僧繇法
貌出公孫看舞迴

賦得夏雲多奇峯

得峯字
八韻

本是依峯出因之肖碧峯請看原觸石何必定從龍為
一抑為二若離還若逢嵯峨形盡幻晦靄勢方濃丁斧
何能展虞歌或可庸城疑現乾闥窓擬列芙蓉矗矗方
迎目英英早盪胸縱艱興寶藏為雨利三農

陸師道雲壑松濤

亭子臨蒼巖嵐靄朝暮接下帶石泉寒上落松風颯作
者頗有意不以人踪雜請君忘耳觀聽彼相問答

急雨

五月廿二日

午熱特劇鬱溽蒸廣廈弗爽炎風仍祝融夏德雖云信
是日小暑節三農曝背誠可矜重基礎潤有明驗須臾西嶺

油雲興陽侯列缺各施技密織空羅知幾層解煩滌暑
只頃刻締綵覺薄紗衣增麥已納困黍怒長但有喜對
無愁憑其然豈其然乎我正憶軍書愁弗勝

宴坐齋中成詠

江浙望晴晴閩粵望雨雨其餘各稱時額手慶農務誰
云此一室每因周九寓報豐不為喜恐屬飾言附告災
輒為愁賙濟敢靳固人情閱知艱

天眷承益懼永言持此志庶不至大悞

賦得動復歸有靜

得為字
八韻

俯仰探元化卷舒理可推乾坤雖示象天地本無為靜
固動之始動還靜有期貞元由遞嬗根柢必歸茲春鳥

能言後風花罷舞時雲成峯定幻川至海何辭詎是攀
舟壑奚妨試管蠡五千標與旨謝客要能窺

惠山園卽景

偶稱寄暢景因涉惠山園臺榭皆曲肖主賓且慢論饒
他千里近消我萬幾煩正爾叅金地陡然憶玉門

墨妙軒

茗華繼閱古

樓名以貯三希堂法帖石刻其績摹入石者則貯墨妙軒

公好

去聲

豈藏

珍慢自方食蔗寧當云積薪烟霞相潤浥賢哲會精神

揭要過庭論誰歟步後塵

題嘉陰軒

高槐閱歲有嘉陰
傍樹開軒具四臨
不礙觀山解蔽日
箇青雲士稱人心

仇英梅逕尋詩圖

玉想丰姿鐵想腸
橫斜踈影蘸銀塘
高人倚樹抒吟思
落筆應知字亦香

詠玉韞

何年玉畫軸
欽手中規輪
可用資三獲
寧稱挽六鈞
取

材率因舊得句亦從新
比似蘇公硯

東坡謝人送硯云
吾兩手其一解寫

字而有三硯
何以多為

猶然愧古人

恭奉

皇太后御園觀荷之作

日暘曰雨以時應
五沃欣邀

懿賞憑香泛沼池
西地錦爽延窓戶
玉壺冰

景禧綏履如川至
藻句題屏與歲增

慈顧尚詢三捷報憂勤敢忘益兢兢

夏日悅心殿

綠樹重陰曉露濃崇基朶殿暑安容視朝每厘勅幾要

因視朝預
日進宮

駐輦偏懷修己恭瓊島罨圖峯翠律金鰲夾

鏡水沄溶適來策騎城西路聊合於斯悅為農

泛舟至瀛臺即景三首

玉竦新脩飲練橫

御河橋以年久
重脩時方告成

輕舟直擬達仙京由

來太液一池水三海何人浪與名

橋北為北海南為中
海過勤政殿紅牆為

南海蓋明季相

泌即有此名

黃頭緩着盪蘭橈為愛芳荷浥露饒襲襲清香無近遠

蓬瀛猶在錦雲標

補植高桐出老枝團陰障暑綠參差墨壺書策三庚靜

正是當年敬業時

春耦齋

春耦鄰豐澤田犁歲演公代耕因展義

今春因南巡例以苑丞代耕

即目每祈豐暘雨今年若黍禾夏日芄五牛致十五

齋中

貯韓泥五牛圖并項聖謨蔣
廷錫所做二卷共為十五云
考牧可因通

虛白室

石縫五丁開假山具真理
蜚緣步仄逕虛室壺天裏誰
謂既狹間曠望莫可揣讀我
西銘篇顏彼南華子底須
辨異同吉祥受止止

愛翠樓

種竹猗猗已作林高樓出竹
翠雲侵虛窓不礙踈還密
詰逕何妨靜以深豈止坐來
滿清聽每宜望去愜幽襟

河陽寄傲非吾事耐可薰風一撫琴

王紱山水

峭壁干雲聳羊腸幾曲盤
勒驢臨陡峽破石出危灘
漁父吟罷罷闔家笑語安
當前勞逸趣不著語憑看

喜雨

六月初七日

弗雨過旬日希霖又一時
油雲纔布絮膏霽遂焚絲
洗滌炎威赫滂流愷澤滋
黍華利結實稻秀起將萎
簷響寧教久漏聲那礙遲
朝簪羣侯謁此喜不為私

夏日討源書屋

問

安宜夏清退食正辰牌於此常勤政諸凡敢懈懷荷清
香到席松古爽延齋理趣

堯年示瞠乎不可階

詠白蓮

銀為世界玉為臺藕是西池阿母栽不染汙泥空豈染
那裁錦繡練斯裁雅宜綠葉高低襯每與紅葩隔別開

看到色香清淨處直稱六月水中梅

題文徵明紅葉漁梁圖即用其韻

繡繪崑峯瀑帶岡秋光人意兩茫茫停雲若貫惠山酒
問渡應知溪號梁

落葉松

松有落葉者乃在興安北其山夏積雪風勁善蕩滌是
木性宜寒翠雲盤崩劣而頗羞獨樹與衆同凋寂崖口
向已無關內何能得我命帶根移培平土固密既因順

木天遂如轉地力奇峯詭石側森森助景色材豈限於域由來繫培植

寓言

四足胎而生兩足卵而育間亦有相反大同而小獨

解一

羽者孚以長

上聲

外白其中黃造物有神權自然含陰陽

二解鷺鴨與埶雞六畜本一例而何巧拙殊伊誰令愚智

三解雞巧善翼卵鷺鴨每不能人審知其然果羸格物情

四解持將鷺鴨卵雜置雞卵內牝雞乃不猜一一為撫字

五 啄殼忽成形顧復多慈情唼藻入水去難悵非已生

六 鷺鴨豈真拙藏拙他代勞鴻雁與鳩鵲抱殼禿翰毛

七 覽物得奇會咄哉彼癡雞翼其白公勝寧非汝子西

八 解

徐賁閬州山水卷

江邊握手別情多圖出巴岷遠岌我棹溯洄問何處
萬重山昔謫仙過

含經堂對雨六韻

作勢徐還急灑空密復疎甘膏真渥矣炎暑總前錯
落成珠宇清凉滿玉除排簷疑瀑布躍沼得飛魚所喜
宜良穡亦還讀我書有如時雨化經訓此菑畲

泛月

池塘暑雨過鴉背斜陽翻蘭舟宜泛月水風爽且寒是
時恰望夜圓魄出東山素輝流入懷可寤不可言絲管
厭繁會山水尋清歡清歡未云已馳情忽萬里三軍枕
雪戈一輪應共此怵然命返舟露布佇報喜

范寬仙山樓閣

雲樹自重重蒼巖壯且濃由來傳北派未覺讓南宗
禪不叅黃蘗仙應居赤松可能容意入擬上最南峯

昆明湖泛舟至藻鑑堂

視事餘清暇昆明一泛舟棹穿錦繡浦堂據鳳麟洲
到此暑何有于焉興每留衡材將析理惟是愧前脩

賦得涉江采芙蓉

於昆明湖上
作得江字

闌澤緣儲水平湖可號江富開花似錦疑是藕如艘入

畫臺成疊呈祥蒂纈雙三閭曾葺蓋洛浦乍移幢愛惜
輕沿棹徘徊朗啟窓香因波瀾淨韻使陸華降佛土光
明藏漁歌欸乃腔採真詠古作擲地尚金拏

玉河泛舟至玉泉

平湖雨後似生潮山色源頭翠不遙耐可進舟乘潤爽
石橋恰過第三條

蝸廬蠓舍學江村桑葉陰陰曲抱原詩意畫情神會處
疑披合幅閱王孫

舟向界湖樓畔維峯姿巒態雅宜追芙蓉舊跡尋不得
塔影橫雲又一時

偷閒攬景亦尋題江硯宣毫侍者齋絕勝常年憑賞處
稻塍禾壠綠雲齊

題倚晴樓

快雨連宵欣快霽玉河沿溯玉泉迎巖樓構築初斷手
吾亦因之號倚晴黍高稻下蔚生意山容水態都怡情
西山復見雲縷吐北漠惟期露布呈一喜一慮一憑覽

喜那勝慮方寸縈

雲鶴岑

深山大澤之中閒雲野鶴從容玉泉咫尺何有吾意依
稀畧同

詠半舫

屢屢臨漪瀾有室築其頂雖乏月帆槩雅近烟波景舫
用實則無舫要畧可領書生滕閣上漁父桃源頃其半
正相同倚蓬發清省

棲霞室作

倚巖久矣三間小憩每因寄閒自愛嵐靄朝暮非闕慕
蘭攝山

卷舒幾縷綺散映帶羣峯翠含一晌風來窓北亦如身
在江南

涵漪齋

臨水背山處夏深雨霽時幾閒聊選勝景謚恰延思荷
氣窓間遞漪光座上披澹懷憑有照妙理契無為

飛淙閣

引水飛流落碧川
韻天琴鎮在窓前
瀑簾何必康王谷
愛此淙淙近且便

練影堂

一泉分數派面勢得兩間
落崖猶曲折入沼乃潺湲
無礙聽時靜雅宜對者閒
把卷消清暇初唐格莫攀

竹繪屏

蘭

巧匠裁文竹圖成蘭蕙叢
削如出輸子畫不藉文同色
帶渭川質香飄楚畹風
天然諧氣韻砌篠翠相籠

竹

竹屏還繪竹離合箇中看
辭澳知幾日猗茵又數竿
參差月留影彷彿籟生寒
昕夕對清節還如銘座端

王蒙山中訪友

杖策溪橋度石磯
春烟潤逼薜蘿衣
主人早倚筠窓待
莫遣門題鳳字歸

立秋日作

代謝弗停運金行速置郵緒風尚婪暑協紀又迎秋玉
宇雲容淡銅仙露氣浮西成雖可望未定豈無愁

即事

我臨江浙慮雨多及別月餘復慮少近聞膏澤始渥霑
溪田率已芄杭稻徐沛始終愁殫霖旋涸旋種旋行潦

豫南四郡大都同

開歸陳許四府州皆苦積潦而歸德尤甚地方大吏率諱匿不報今春南

巡遂次察知立命查勘賑卹

諱災獨未被恩早向隅尤予所厯懷賑

救疏淪策勤討燕齊今歲慶時若晚田再雨纔稱好一
念九寓不遑寧八珍方丈安能飽

題管道昇紫竹庵圖

緣結非色空語叅無義味却嗤咏絮材未脫鄉嫖氣

急雨

六月二十八日

婪暑邇日騰炎威晚田望澤枯欲萎前此時若恐虛擲
我心憂慙如調飢密雲佈宇只頃刻艮風坎雨相招携
金官白帝施號令素輿玉馬珠璫旗玉女投壺天帝笑

鞭馳列缺豐隆隨前日火流疑未盡一時湔濯驅無遺

泉弱湖消池待竭須臾漲影將平堤水亭空濛眄烟景

生寒忽欲添紗衣利農蠲疾人心悅吾亦因悅非虛詞

軍書適報有佳信

適得軍營來報偵知叛賊阿睦爾撒納踪跡甚近參贊大臣富德率衆奮

勇追捕計日就擒

佇待獲醜班貞師

題錢選紅白牡丹

白如飛燕瘦紅是太真肥相並春風裏忘年國色頎

已是絕倫類還因恨自家被人稱富貴緣未洗鉛華

七月朔日作

羲御臨西陸靈臺報白藏夜分辭夙暑晨起覺微涼露
滿盤千尺雲披錦七襄雨過餘潤氣霽斂澹烟光荷沼
紅成紫禾塍綠欲黃拂簷高樹朗繞砌雜花芳綺閣聊
留憩芸編可就將碧霄纖翳淨嘉兆慶宜暘

題明宣宗畫魚缸

魚樂非關濠上尋玻璃缸影露浮沉看他吻藻乘波趣
頗見民胞物與心

池上居

引流藉高水曲折成石渠注池得半畝爰鑿龍首疏池
上何所有文軒碧紗幙池畔何所有九松翠鬱扶步廊
三面圍其外乃後湖湖亦豈大哉池亦豈小乎誰復辨
異同惟以資灌輸是時新秋霽煩暑逃如無澄景又一
時觸目皆清殊迴思數年來憂樂每與俱樂覺未滿眼
憂若常盈軀展轉被境遷寧云見道徒咄哉吾言失先
憂原屬吾

翠微堂

倚巖樹古綠陰森樸室悠然稱道心
開著近西窓遠望西山也見翠微深

陳仲仁山水

萬葉紛秋色千巖落瀑聲丹青誰不
解難是箇中情

新秋玉泉山登眺

半夜西風雲縷空碧天曉景清如洗
借問望秋何處宜玉泉朗翠近尺咫
輕輿郊路不生塵露霏叅阪香迎人

三時雨暘塵較量對此能無意為欣林泉明秀松軒爽
坐來心結青霞想傳餐視事率已罷乘涼山徑攀蘿上
冠峯書室憑巉嶢因悟得逸恒於勞皇都保泰思圖永
西海銷兵慮企遙堵波重構伽藍護似是金源建亭處
廢興千古為慨然俯仰一時屬偶遇

創得齋

山之復更水之涯領要軒窓納衆奇為不頻來如創得
欣於始遇每如斯

近青閣

高樓清曉霽秋烟
罨牖崑峯一朵蓮
若曰其人當姓李
擬因津逮却瞠然

麗矚軒

玉泉最高處趁爽一登來
幾暇崇情託清秋
麗矚開黍華彌繡甸
桂粟吐瑤臺古北憑窓近
行將獵騎催

靜怡書屋

書屋玉峯西憑高望若低於斯
臨更下又覺鮮相齊
理

趣恒供會靜怡微識倪迴頭看麗矚句在白雲題

題沈周桂花書屋圖

幽人結屋桂花陰
葉葉綠瓊穗穗金
彼自悠然無世念
小山動我白駒心

初月

伏火西流盡生蟾
秋始看影纔一彎
細意早十分寒幾
處驚鳴杵何人倦
枕鞍渠魁猶待馘
絕域可云安

即事

宜雨又宜暘籌農念畧康豫齊愁雨潦

今年六月中河南之開歸陳衛

山東之兗曹所屬縣多以靈雨壞田廬

徐沛厯河防

徐州為河流樞要淤沙淺阻積年為害今

春親臨閱視亟命大臣經理為久遠計

仍是憂饒樂那論暫與常勅幾忙

失學慙偶對縑緗

王蒙松窓高士圖

澗邊濯足還聽瀑間著松窓一事無借問伊人何姓氏
非愚公定是潛夫

西直門外

曉日鳴鞭露氣濃如雲多稼蔚丰茸雖然未是腰鎌候
此景常年得鮮逢

春雨頻霑夏若時築場早忝看如坻聶夷中句尋常憶
救急欣先一月期

秋日承光殿

朶殿居中七寶欄層城規擁一輪團秋風太液漪瀾映
祇訝人遊是廣寒

嵌巖室

假山似真山
巖薛亦岵岵
結宇依峭蒨
時時落花雨
會之乃不窮
即之復無所
人境誰使然
於斯難著語

植秀軒

伏中移竹罷
雨後到軒初
清聽入窓牖
疏觀映砌除
寧惟將俗遠
蕪可學心虛
設以菁莪擬
育才亦起予

環碧樓

一樓一室各稱名
得概隨方自會情
著語再三率因便
搜題左右不妨生
重陰疊翠地無隙
玉露金風天與清

最喜近郊堪縱目
村村寶穡望西成

進舟長河過樂善園戲題一韻二首

今年兩度泛長河
曾未停舟徑直過
樹石有情能不語
主人何事太忙多

舊園重葺近臨河
憶始經營每重過
早識往來率無暇
向來位置底須多

由昆明湖泛舟至鑑遠堂作

石橋迴望綵虹橫
勝處維舟一倚楹
鑑遠試吟親切句

適來真是鏡中行

題無盡意軒

背山臨水最佳處玉露金風恰好時屏展吳山十六景

意無盡偶亦如斯

軒屏圖吳山十六景張宗蒼所畫也

石丈亭

得石號丈峯顏軒取米老蟹窓眄烟波蒼茫復浩渺襄陽墨戲半真贗真者如斯歷刼好

繪芳堂

境是先天境堂名後素堂羣芳自設色大塊假文章榮
謝亦何有虛明本若常饒他粉壁畫四季景隨償

惠山園

園學秦家寄暢心

秦園名
寄暢

閱時筠木亦陰森由來日涉

纔成趣却我幾忙率偶臨雲斂琳霄目因迥水澄蘭沼
意俱深靜觀別有相應處理趣當前不藉尋

題盛懋山水

蒼山白雲外茅屋竹籬西牖下閒談古船頭獨泛谿神

傳殊朗朗意潤轉淒淒拈得其中妙依稀是仲圭

詠木孟子

囿園木孟子巖穴出何年雖謝根茲地仍全貞素天績
雕曾弗藉樸雅尚如然大隱射其覆為君喻以圓亦非
事斟酌可與共周旋真率長生示吾懷工部篇

題王蒙松谿草堂圖

對坐茅簷下誰能賓主分高談為底事不可得而聞

自驚

彭城夏孟閔河工小設施救弊而已河高隄卑乏善策
伏秋大汎惟時矣南望無刻敢釋心生靈億萬所攸恃
詰旦問有南來章河臣限馳四百里喈哉此恐非佳音
啟囊怵惕忙披視乃議曰脩治河疏郵傳原屬遵吾旨
河臣奏至限行四百里乃急報也閔之則侍郎表曰脩
治河疏命河臣督臣定議驛聞者傳遞實遵前旨耳
樾茭惟固沙更刷額慶吾民蒙佑祉自驚自致自復慰
近臣那易知有喜

沈度山意衝寒欲放梅圖

老榦橫斜倚碧峯雪餘春意已春容斷橋西畔孤山後
大得其神惜未逢

遣悶

遣悶成言莫喚詩底須得失倩人知禹湯文武政如彼
孔孟程朱道繫誰四海非遙方寸蘊萬民之衆一人治
思量那有閒心緒更逐風雲月露為

趙孟頫高逸圖

詭石長松境不凡華陽巾好謝朝衫伯倫似與仲容晤

促向林中撥阮咸

松花石屏

質似峯山玉磨為敞座屏清防名雅稱畫飾俗堪停明
厭瑠璃脆暗通風月靈勤思班伯對亦可藉為銘

題卓廸修稷圖

茂林脩竹此間多展卷居然晉永和千載由人摹稷帖
孰傳骨髓孰傳訛

賜江蘇巡撫陳弘謀之任

東南繁劇地撫治寄賢良為我蘇徐海宜民簡召

信王臣

成

允惟力溝洫方可課耕桑實政斯應樹虛名尚謹防
一心要於敬五字示其綱勗爾推行善芳同桂嶺長

題陳書荷花

濯漣色不妖微露香都淨能底神韻傳伊人本蓮性

哈薩克稱臣內屬遣使進貢詩以紀事

有序

哈薩克即大宛也從古不通中國雖漢武勞師動
衆僅得其馬猶且動色頌功斯何稱焉去歲我師

因追叛寇阿睦爾撒納直入其境哈薩克撤帳驅畜遁去數千里朕以絕域駐師非計也命撤師哈薩克悔其為阿睦爾撒納所賣謀擒之以獻而奸賊復自哈薩克逃迴準噶爾乘噶爾藏多爾濟巴雅爾等之亂鳩張嘯聚今春我師重入伊犁問罪則噶爾藏多爾濟已被其姪札努噶爾卜所害而札努噶爾卜又為阿睦爾撒納所襲僅以身免我叅贊大臣富德率師窮追阿睦爾撒納巴雅爾適

與哈薩克師遇哈薩克不敢犯我師顏其汗阿布
賚隨遣使稱臣入覲今已雅爾已獲阿睦爾撒納
亦不日成擒即或竄入哈薩克而哈薩克亦約縛
之以獻喜銷兵之有日爰點翰以成辭

采入伊犁靖陸梁鯨鯢懲逆武維揚已看頡利成生虜
又報洛那歸職方致馬本非如武帝閉關未得學蕭王
更欣願縛渠魁獻載戢干戈日月光

趙孟堅水仙即用其韻

評量卉譜合稱仙脫俗離塵意洒然不與荷花爭夏日
為他微有淨中妍

御製詩二集卷七十三